

官板
五經白文

禮記一

漢書門			
四	〇	〇	〇
九	〇	〇	〇
六	〇	〇	〇
七	〇	〇	〇
冊	架	函	號

內閣文庫			
三	四		漢
五	〇		書
函	〇		
一	七	六	
六	〇	〇	
架	冊	號	類

內閣文庫		
番號	漢	4006
冊數	7 (3)	
函號	275	214

0 1 2 3 4 5 6 7 8 9 cm

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



禮記

禮記集說序

淺草文庫

前聖繼天立極之道莫大於禮後聖垂世立教之書亦莫先於禮禮儀三百威儀三千孰非精神心術之所寓故能與天地同其節四代損益世遠經殘其詳不可得聞矣儀禮十七篇戴記四十九篇先儒表章庸學遂為千萬世道學之淵源其四十七篇之文雖純駁不同然義之淺深同異誠未易言也鄭氏祖識緯孔疏惟鄭之

五系白文
禮序
從雖有他說不復收載固爲可恨然其灼然可據者不可易也近世應氏集解於雜記大小記等篇皆闕而不釋噫慎終追遠其關於人倫世道非細故而可略哉先君子師事雙峰先生十有四年以是經三領鄉書爲開慶名進士所得於師門講論甚多中罹煨燼隻字不遺不肖孤僭不自量會萃衍繹而附以臆見之言名曰禮記集說蓋欲以坦明之說使初學讀之卽了其中

義庶幾章句通則縕奧自見正不必高爲議論而卑視訓詁之辭也書成甚欲就正于四方有道之士而衰年多疾遊歷良艱姑藏巾笥以俟來哲治教方興知禮者或有取焉亦愚者千慮之一爾至治壬戌良月旣望後學東匯澤陳澹序

禮記篇目
 曲禮上第一
 檀弓上第三
 王制第五
 曾子問第七
 禮運第九
 郊特牲第十一
 玉藻第十三
 曲禮下第二
 檀弓下第四
 月令第六
 文王世子第八
 禮器第十
 內則第十二
 明堂位第十四

禮記篇目

曲禮上第一

曲禮下第二

檀弓上第三

檀弓下第四

王制第五

月令第六

曾子問第七

文王世子第八

禮運第九

禮器第十

郊特牲第十一

內則第十二

玉藻第十三

明堂位第十四

喪服小記第十五

大傳第十六

少儀第十七

學記第十八

樂記第十九

雜記上第二十

雜記下第二十一

喪大記第二十二

祭法第二十三

祭義第二十四

祭統第二十五

經解第二十六

哀公問第二十七

仲尼燕居第二十八

孔子間居第二十九

坊記第三十

中庸第三十一

朱子章句

表記第三十二

緇衣第三十三

奔喪第三十四

問喪第三十五

服問第三十六

問傳第三十七

三年問第三十八

深衣第三十九

投壺第四十

儒行第四十一

大學第四十二

朱子章句

冠義第四十三

昏義第四十四

鄉飲酒義第四十五

射義第四十六

燕義第四十七

聘義第四十八

喪服四制第四十九

名義第四十四

祭義第四十一

大學第四十二

祭義第四十

禮記卷之四十一

祭義第三十九

禮記卷之四十二

祭義第三十八

禮記卷之四十三

祭義第三十七

禮記卷之四十四

祭義第三十六

禮記卷之四十五

禮記

曲禮上第一

曲禮曰毋不敬儼若思安定辭安民哉

敖不可長欲不可從志不可滿樂不可極

賢者狎而敬之畏而愛之愛而知其惡憎而知

其善積而能散安安而能遷節臨財毋苟得

臨難毋苟免狠毋求勝分毋求多節疑事毋

質直而勿有

若夫坐如尸立如齊

禮從宜使從俗節夫禮者所以定親疏決嫌疑

別同異明是非也禮不妄說人不辭費節禮

不踰節不侵侮不好狎

修身踐言謂之善行行修言道禮之質也

禮聞取於人不聞取人禮聞來學不聞往教

道德仁義非禮不成節教訓正俗非禮不備節

分爭辯訟非禮不決節君臣上下父子兄弟

非禮不定節宦學事師非禮不親節班朝治

軍涖官行法非禮威嚴不行節禱祠祭祀供

給鬼神非禮不誠不莊節是以君子恭敬擗

節退讓以明禮

鸚鵡能言不離飛鳥猩猩能言不離禽獸今人

而無禮雖能言不亦禽獸之心乎夫惟禽獸

無禮故父子聚麀節是故聖人作為禮以教

人使人以有禮知自別於禽獸

太上貴德其次務施報禮尚往來往而不來非禮也來而不往亦非禮也

人有禮則安無禮則危故曰禮者不可不學也節夫禮者自卑而尊人雖負販者必有尊也而況富貴乎節富貴而知好禮則不驕不淫貧賤而知好禮則志不懾

人生十年曰幼學二十曰弱冠三十曰壯有室四十曰強而仕五十曰艾服官政六十曰耆

天指使七十曰老而傳八十九十曰耄七年曰悼悼與耄雖有罪不加刑焉百年曰期頤

大夫七十而致事節若不得謝則必賜之几杖節行役以婦人適四方乘安車節自稱曰老夫於其國則稱名節越國而問焉必告之以其制

謀於長者必操几杖以從之長者問不辭讓而對非禮也

凡為人子之禮冬溫而夏清昏定而晨省在醜夷不爭

夫為人子者三賜不及車馬故州閭鄉黨稱其孝也兄弟親戚稱其慈也僚友稱其弟也執友稱其仁也交遊稱其信也節見父之執不謂之進不敢進不謂之退不敢退不問不敢對此孝子之行也

夫為人子者出必告反必面所遊必有常所習

必有業節恒言不稱老

年長以倍則父事之十年以長則兄事之五年以長則肩隨之節羣居五人則長者必異席為人子者居不主奧坐不中席行不中道立不中門節食饗不為槩節祭祀不為尸節聽於無聲視於無形節不登高不臨深不苟訾不苟笑孝子不服闇不登危懼辱親也父母存不許友以死不有私財

爲人子者。父母存。冠衣不純素。節。孤子當室冠

衣不純采。

幼子常視母誑。節。童子不衣裘裳。立必正方。不

傾聽。節。長者與之提攜。則兩手奉長者之手。

負劔辟。呬詔之。則掩口而對。

從於先生。不越路而與人言。遭先生於道。趨而

進。正立拱手。先生與之言。則對。不與之言。則

趨而退。

從長者而上。丘陵則必鄉。長者所視。登城不指。

城上不呼。

將適舍。求毋固。

將上堂。聲必揚。戶外有二屨。言聞則入。言不聞

則不入。節。將入戶。視必下。入戶。奉扃。視瞻毋

回。戶開亦開。戶闔亦闔。有後入者。闔而勿遂。

節。毋踐屨。毋踏席。摳衣趨隅。必慎。唯諾。

大夫士出入君門。由闈右。不踐闕。

凡與客入者每門讓於客客至於寢門則主人請入為席然後出迎客客固辭主人肅客而入節主人入門而右客入門而左主人就東階客就西階客若降等則就主人之階主人固辭然後客復就西階節主人與客讓登主人先登客從之拾級聚足連步以上上於東階則先右足上於西階則先左足

帷薄之外不趨堂上不趨執玉不趨堂上接武

堂下布武室中不翔

竝坐不橫肱授立不跪授坐不立

凡為長者糞之禮必加帚於箕上以袂拘而退其塵不及長者以箕自鄉而扱之

奉席如橋衡節請席何鄉請衽何趾節席南鄉北鄉以西方為上東鄉西鄉以南方為上節

若非飲食之客則布席席間函丈節主人跪正席客跪撫席而辭客徹重席主人固辭客

母與
無通
下同

踐席乃坐節主人不問客不先舉節將即席
 容毋怍兩手握衣去齊尺衣毋撥足毋蹶
 先生書策琴瑟在前坐而遷之戒勿越
 虛坐盡後食坐盡前坐必安執爾顏長者不及
 毋僂言節正爾容聽必恭毋勦說毋雷同必
 則古昔稱先王
 侍坐於先生先生問焉終則對節請業則起請
 益則起

父召無諾先生召無諾唯而起
 侍坐於所尊敬無餘席見同等不起節燭至起
 食至起上客起節燭不見跋節尊客之前不
 叱狗節讓食不唾
 侍坐於君子君子欠伸撰杖屨視日蚤莫待坐
 者請出矣節侍坐於君子君子問更端則起
 而對節侍坐於君子若有告者曰少間願有
 復也則左右屏而待

毋側聽毋噉應毋淫視毋怠荒節遊無倨立無
跛坐毋箕寢毋伏節斂髮毋髡節冠毋免勞
毋袒暑毋褰裳

侍坐於長者屨不上於堂解屨不敢當階節就
屨跪而舉之屏於側節鄉長者而屨跪而遷
屨俯而納屨

架同 枷與

離坐離立毋往參焉離立者不出中間節至
男女不雜坐不同櫬枷不同巾櫛不親授節嫂

叔不通問諸毋不漱裳節外言不入於梱內
言不出於梱節女子許嫁纓非有大故不入
其門節姑姊妹女子子已嫁而反兄弟弗與
同席而坐弗與同器而食節父子不同席節
男女非有行媒不相知名非受幣不交不親
節故日月以告君齊戒以告鬼神為酒食以
召鄉黨僚友以厚其別也節取妻不取同姓
節故買妾不知其姓則卜之

寡婦之子非有見焉弗與為友

賀取妻者曰某子使某聞子有客使某羞

貧者不以貨財為禮老者不以筋力為禮

名子者不以國不以日月不以隱疾不以山川

男女異長節男子二十冠而字節父前子名君

前臣名節女子許嫁笄而字

凡進食之禮左殺右馘食居人之左羹居人之

右膾炙處外醯醬處內蔥漆處末酒漿處右

以脯脩置者左胸右末節客若降等執食興

辭主人興辭於客然後客坐節主人延客祭

祭食祭所先進殺之序徧祭之節三飯主人

延客食馘然後辯殺節主人未辯客不虛口

侍食於長者主人親饋則拜而食主人不親饋

則不拜而食節共食不飽共飯不澤手節毋

搏飯毋放飯毋流歎節毋啗食毋齧骨毋反

魚肉毋投與狗骨毋固獲節毋揚飯飯黍毋

以箸節毋噉羹毋絮羹毋刺齒毋歃醢客絮羹主人辭不能亨客歃醢主人辭以窶節濡肉齒決乾肉不齒決毋噉炙節卒食客自前跪徹飯齊以授相者主人興辭於客然後客坐。

侍飲於長者酒進則起拜受於尊所長者辭少者反席而飲長者舉未醕少者不敢飲節長者賜少者賤者不敢辭。

賜果於君前其有核者懷其核節御食於君君賜餘器之漑者不寫其餘皆寫。

餽餘不祭父不祭子夫不祭妻。

御同於長者雖貳不辭偶坐不辭。

羹之有菜者用挾其無菜者不用挾。

為天子削瓜者副之巾以絺為國君者華之巾以綌為大夫累之士寔之庶人齧之。

父母有疾冠者不櫛行不翔言不惰琴瑟不御。

食肉不至變味飲酒不至變貌笑不至矧怒
不至詈疾止復故

有憂者側席而坐有喪者專席而坐

水潦降不獻魚鼈節獻鳥者佛其首畜鳥者則

勿佛也節獻車馬者執策綏節獻甲者執冑

獻杖者執末節獻民虜者操右袂節獻粟者

執右契獻米者操量鼓節獻熟食者操醬齊

節獻田宅者操書致

凡遣人弓者張弓尚筋弛弓尚角右手執簫左

手承附尊卑垂悅若主人拜則客還辟辟拜

節主人自受由客之左接下承附鄉與客竝

然後受節進劍者左首節進戈者前其鏹後

其刃節進矛戟者前其鏃節進几杖者拂之

節效馬效羊者右牽之節效犬者左牽之節

執禽者左首節飾羔鴈者以纁節受珠玉者

以掬節受弓劍者以袂節飲玉爵者弗揮

凡以弓劍苞苴篋笥問人者操以受命如使之容。

凡為君使者已受命君言不宿於家節君言至則主人出拜君言之辱使者歸則必拜送于門外節若使人於君所則必朝服而命之使者反則必下堂而受命。

博聞強識而讓敦善行而不怠謂之君子節君子不盡人之歡不竭人之忠以全交也。

禮曰君子抱孫不抱子此言孫可以為王父尸子不可以為父尸為君尸者大夫士見之則下之君知所以為尸者則自下之尸必式乘必以几。

齊者不樂不弔。

居喪之禮毀瘠不形視聽不衰升降不由阼階出入不當門隧節居喪之禮頭有創則沐身有瘍則浴有疾則飲酒食肉疾止復初不勝。

喪乃比於不慈不孝。節五十不致毀六十不毀七十唯衰麻在身飲酒食肉處於內。生與來日死與往日。

知生者弔知死者傷知生而不知死弔而不傷知死而不知生傷而不弔。

弔喪弗能賻不問其所費問疾弗能遺不問其所欲見人弗能館不問其所舍。節賜人者不曰來取與人者不問其所欲。

適墓不登壟助葬必執紼。節臨喪不笑。節揖人必違其位。節望柩不歌入臨不翔當食不歎。節鄰有喪春不相。節里有殯不巷歌。適墓不歌哭日不歌。節送喪不由徑送葬不辟塗潦。節臨喪則必有哀色執紼不笑。節臨樂不歎。節介冑則有不可犯之色。故君子戒慎不失色於人。

國君撫式大夫下之大夫撫式士下之。

禮不下庶人刑不上大夫
刑人不在君側

兵車不式武車綏旌德車結旌

史載筆士載言節前有水則載青旌節前有塵

埃則載鳴鳶節前有車騎則載飛鴻節前有

士師則載虎皮節前有摯獸則載貔貅節行

前朱鳥而後玄武左青龍而右白虎招搖在

上急繕其怒節進退有度左右有局各司其

局

父之讎弗與共戴天兄弟之讎不反兵交遊之

讎不同國

四郊多壘此卿大夫之辱也地廣大荒而不治

此亦士之辱也

臨祭不惰

祭服敝則焚之祭器敝則埋之龜筮敝則埋之

牲死則埋之

凡祭於公者必自徹其俎。

卒哭乃諱。禮不諱嫌名。二名不偏諱。節逮事父

母則諱王父母。不逮事父母則不諱王父母。

節君所無私諱。大夫之所有公諱。節詩書不

諱。臨文不諱。節廟中不諱。節夫人之諱雖質

君之前臣不諱也。婦諱不出門。大功小功不

諱。節入竟而問禁。入國而問俗。入門而問諱。

外事以剛日。內事以柔日。

凡卜筮日旬之外曰遠某日。旬之內曰近某日。

喪事先遠日。吉事先近日。節曰為日。假爾泰

龜有常。假爾泰筮有常。卜筮不過三。卜筮不

相襲。節龜為卜。筮為筮。卜筮者先聖王之所

以使民信時日。敬鬼神畏法令也。所以使民

決嫌疑。定猶與也。故曰疑而筮之則弗非也。

日而行事則必踐之。

君車將駕則僕執策立於馬前。節已駕僕展軫

效駕節奮衣由右上取貳綏跪乘節執策分
 轡驅之五步而立節君出就車則僕并轡授
 綏左右攘辟節車驅而騶至于大門君撫僕
 之手而顧命車右就車門閭溝渠必步
 凡僕人之禮必授人綏若僕者降等則受不然
 則否節若僕者降等則撫僕之手不然則自
 下拘之
 客車不入大門婦人不立乘犬馬不上於堂

故君子式黃髮下卿位入國不馳入里必式
 君命名雖賤人大夫士必自御之
 介者不拜為其拜而菱拜
 祥車曠左乘君之乘車不敢曠左左必式節僕
 御婦人則進左手後右手節御國君則進右
 手後左手而俯
 國君不乘奇車車上不廣欵不妄指節立視五
 轡式視馬尾顧不過轂

國中以策彗卹勿驅塵不出軌

國君下齊牛式宗廟大夫士下公門式路馬

乘路馬必朝服載鞭策不敢授綏左必式節步

蹶與同

路馬必中道以足蹶路馬芻有誅齒路馬有

誅

曲禮下第二

凡奉者當心提者當帶節執天子之器則上衡

綏讀曰妥

國君則平衡大夫則綏之士則提之節凡執

主器執輕如不克執主器操幣圭璧則尚左

手行不舉足車輪曳踵節立則磬折垂佩主

佩倚則臣佩垂主佩垂則臣佩委節執玉其

有藉者則裼無藉者則襲

國君不名卿老世婦大夫不名世臣姪娣士不

名家相長妾

君大夫之子不敢自稱曰余小子大夫士之子

不敢自稱曰嗣子某不敢與世子同名

君使士射不能則辭以疾言曰某有負薪之憂
 侍於君子不顧望而對非禮也
 君子行禮不求變俗祭祀之禮居喪之服哭泣
 之位皆如其國之故謹脩其法而審行之節
 去國三世爵祿有列於朝出入有詔於國若
 兄弟宗族猶存則反告於宗後去國三世爵
 祿無列於朝出入無詔於國唯興之日從新
 國之法

苞讀
 為薦

君子已孤不更名節已孤暴貴不為父作謚
 居喪未葬讀喪禮既葬讀祭禮喪復常讀樂章
 居喪不言樂祭事不言凶公庭不言婦女
 振書端書於君前有誅倒筴側龜於君前有誅
 龜筴几杖席蓋重素衫絺綌不入公門節苞履
 扱衽厭冠不入公門節書方衰凶器不以告
 不入公門
 公事不私議

君子將營宮室宗廟為先廡庫為次居室為後
 節凡家造祭器為先犧賦為次養器為後節
 無田祿者不設祭器有田祿者先為祭服君
 子雖貧不粥祭器雖寒不衣祭服為宮室不
 斬於丘木
 大夫士去國祭器不踰竟大夫寓祭器於大夫
 士寓祭器於士
 大夫士去國踰竟為壇位鄉國而哭素衣素裳

素冠徹緣鞮屨素箴乘髦馬不蚤鬚不祭食
 不說人以無罪婦人不當御三月而復服
 大夫士見於國君君若勞之則還辟再拜稽首
 節君若迎拜則還辟不敢荅拜
 大夫士相見雖貴賤不敵主人敬客則先拜客
 客敬主人則先拜主人
 凡非弔喪非見國君無不荅拜者
 大夫見於國君國君拜其辱士見於大夫大夫

拜其辱同國始相見主人拜其辱

君於士不荅拜也非其臣則荅拜之大夫於其

臣雖賤必荅拜之節男女相荅拜也

國君春田不圍澤大夫不掩群士不取麇卵

歲凶年穀不登君膳不祭肺馬不食穀馳道不

除祭事不縣大夫不食梁士飲酒不樂

君無故玉不去身大夫無故不徹縣士無故不

徹琴瑟

士有獻於國君他日君問之曰安取彼再拜稽

首而后對

大夫私行出疆必請反必有獻士私行出疆必

請反必告君勞之則拜問其行拜而后對

國君去其國止之曰奈何去社稷也大夫曰奈

何去宗廟也士曰奈何去墳墓也國君死社

稷大夫死衆士死制

君天下曰天子朝諸侯分職授政任功曰予一

人節踐阼臨祭祀內事曰孝王某外事曰嗣
 王某節臨諸侯畛於鬼神曰有天王某甫節
 崩曰天王崩復曰天子復矣告喪曰天王登
 假措之廟立之主曰帝節天子未除喪曰予
 小子生名之死亦名之

天子有后有夫人有世婦有嬪有妻有妾
 天子建天官先六大曰大宰大宗大史大祝大
 士大小典司六典節天子之五官曰司徒司

馬司空司土司寇典司五衆節天子之六府
 曰司土司木司水司草司器司貨典司六職
 節天子之六工曰土工金工石工木工獸工
 草工典制六材

五官致貢曰享節五官之長曰伯是職方其擯
 於天子也曰天子之吏天子同姓謂之伯父
 異姓謂之伯舅自稱於諸侯曰天子之老於
 外曰公於其國曰君節九州之長入天子之

國曰牧。天子同姓謂之叔父，異姓謂之叔舅。
 於外曰侯，於其國曰君。節其在東夷、北狄、西
 戎、南蠻，雖大曰子，於內自稱曰不穀，於外自
 稱曰王老。節庶方小侯入天子之國曰某人，
 於外曰子，自稱曰孤。

天子當依而立，諸侯北面而見天子曰覲。天子
 當寧而立，諸公東面，諸侯西面曰朝。節諸侯
 未及期相見曰遇，相見於卻地曰會。節諸侯

使大夫問於諸侯曰聘。節約信曰誓，涖牲曰
 盟。

諸侯見天子曰臣，某侯某，其與民言自稱曰寡
 人，其在凶服曰適子孤。節臨祭祀內事曰孝
 子，某侯某，外事曰曾孫某侯某，死曰薨，復曰
 某甫復矣。節既葬見天子曰類，見言謚曰類。
 節諸侯使人使於諸侯，使者自稱曰寡君之
 老。

天子穆穆諸侯皇皇大夫濟濟士蹇蹇庶人僬

天子之妃曰后諸侯曰夫人大夫曰孺人士曰

婦人庶人曰妻節公侯有夫人有世婦有妻

有妾夫人自稱於天子曰老婦節自稱於諸

侯曰寡小君節自稱於其君曰小童自世婦

以下自稱曰婢子節子於父母則自名也

列國之大夫入天子之國曰某士自稱曰陪臣

某於外曰子於其國曰寡君之老使者自稱

曰某

天子不言出諸侯不生名君子不親惡諸侯失

地名滅同姓名

為人臣之禮不顯諫三諫而不聽則逃之節子

之事親也三諫而不聽則號泣而隨之

君有疾飲藥臣先嘗之親有疾飲藥子先嘗之

醫不三世不服其藥

儼人必於其倫。

問天子之年對曰聞之始服衣若干尺矣節問

國君之年長曰能從宗廟社稷之事矣節問

未能從宗廟社稷之事也節問大夫之子長

曰能御矣節問士之子長曰

能典謁矣節問幼曰未能典謁也節問庶人之子

長曰能負薪矣節問幼曰未能負薪也

問國君之富數地以對山澤之所出節問大夫

禮與

之富曰有宰食力祭器衣服不假節問士之

富以車數對節問庶人之富數畜以對

天子祭天地祭四方祭山川祭五祀歲徧諸侯

方祀祭山川祭五祀歲徧大夫祭五祀歲徧

士祭其先

凡祭有其廢之莫敢舉也有其舉之莫敢廢也

非其所祭而祭之名曰淫祀淫祀無福

天子以犧牛諸侯以肥牛大夫以索牛士以羊

豕

支子不祭祭必告于宗子

凡祭宗廟之禮牛曰一元大武節豕曰剛鬣節

豚曰腍肥節羊曰柔毛節雞曰翰音節犬曰

羹獻節雉曰疏趾節兔曰明視節脯曰尹祭

節橐魚曰商祭節鮮魚曰脰祭節水曰清滌

節酒曰清酌節黍曰薌合節梁曰薌萁節稷

曰明粢節稻曰嘉蔬節韭曰豐本節鹽曰鹹

蔬與
疏同

醴節玉曰嘉玉節幣曰量幣

天子死曰崩諸侯曰薨大夫曰卒士曰不祿庶

人曰死在牀曰尸在棺曰柩羽鳥曰降四足

曰漬死寇曰兵

祭王父曰皇祖考王母曰皇祖妣父曰皇考母

曰皇妣夫曰皇辟節生曰父曰母曰妻死曰

考曰妣曰嬪壽考曰卒短折曰不祿

天子視不上於袷不下於帶國君綏視大夫衡

大視士視五步節凡視上於面則傲下於帶則
憂傾則姦

君命大夫與士肄在官言官在府言府在庫言
祭庫在朝言朝節朝言不及犬馬節輟朝而顧
不有異事必有異慮故輟朝而顧君子謂之
固節在朝言禮問禮對以禮節大享不問卜
不饒富

摯與
贊同

凡摯天子鬯諸侯圭卿羔大夫鴈士雉庶人之

匹讀
為鶩

摯匹童子委摯而退野外軍中無摯以纓拾
矢可也節婦人之摯棋棹脯脩棗栗

納女於天子曰備百姓於國君曰備酒漿於大
夫曰備埽灑

檀弓上第三

公儀仲子之喪檀弓免焉仲子舍其孫而立其
子檀弓曰何居我未之前聞也趨而就子服
伯子於門右節曰仲子舍其孫而立其子何

也。伯子曰：仲子亦猶行古之道也。昔者文王舍伯邑考而立武王，微子舍其孫臚而立衍也。夫仲子亦猶行古之道也。子游問諸孔子，孔子曰：否，立孫。

事親有隱而無犯，左右就養無方，服勤至死，致喪三年，事君有犯而無隱，左右就養有方，服勤至死，方喪三年，事師無犯無隱，左右就養無方，服勤至死，心喪三年。

季武子成寢，杜氏之葬在西階之下，請合葬焉。許之，入宮而不敢哭。武子曰：合葬非古也，自周公以來未之有改也。吾許其大而不許其細，何居？命之哭。

子上之母死而不喪，門人問諸子思曰：昔者子之先君子喪出母乎？曰：然。子之不使白也，喪之何也？子思曰：昔者吾先君子無所失道，道隆則從而隆，道污則從而污，伋則安能為伋。

也妻者。是為白也。母不為。伋也。妻者。是不為白也。母故。孔氏之不喪出母。自子思始也。孔子曰。拜而后稽顙。顙乎其順也。稽顙而后拜。順乎其至也。三年之喪。吾從其至者。孔子既得合葬於防。曰。吾聞之。古也。墓而不墳。今丘也。東西南北之人也。不可以弗識也。於是封之。崇四尺。節。孔子先反。門人後。雨甚至。孔子問焉。曰。爾來何遲也。曰。防墓崩。孔子不

應。三。孔子泫然流涕曰。吾聞之。古不脩墓。孔子哭子路於中庭。有人弔者。而夫子拜之。既哭。進使者而問。故。使者曰。醢之矣。遂命覆醢。曾子曰。朋友之墓。有宿草而不哭焉。子思曰。喪三日而殯。凡附於身者。必誠。必信。勿之有悔焉耳矣。三月而葬。凡附於棺者。必誠。必信。勿之有悔焉耳矣。節。喪三年。以為極。亡則弗之忘矣。故君子有終身之憂。而無一朝

之患故忌日不樂

孔子少孤不知其墓殯於五父之衢人之見之

者皆以為葬也其慎也蓋殯也問於耶曼父

之母然後得合葬於防

鄰有喪春不相里有殯不巷歌節喪冠不綏

有虞氏瓦棺夏后氏塋周殷人棺槨周人牆置

娶

周人以殷人之棺槨葬長殤以夏后氏之塋周

葬中殤下殤以有虞氏之瓦棺葬無服之殤

夏后氏尚黑大事斂用昏戎事乘驪牲用玄殷

人尚白大事斂用日中戎事乘翰牲用白周

人尚赤大事斂用日出戎事乘駟牲用騂

穆公之母卒使人問於曾子曰如之何對曰申

也聞諸申之父曰哭泣之哀齊斬之情餼粥

之食自天子達布幕衛也繆幕魯也

晉獻公將殺其世子申生公子重耳謂之曰子

五經白文 禮一 三十一
蓋言子之志於公乎。世子曰：不可。君安驪姬，是我傷公之心也。節曰：然則蓋行乎。世子曰：不可。君謂我欲弑君也。天下豈有無父之國哉。吾何行如之。節使人辭於狐突曰：申生有罪，不念伯氏之言也，以至于死。申生不敢愛其死，雖然，吾君老矣，子少，國家多難，伯氏不出而圖吾君。伯氏苟出而圖吾君，申生受賜而死，再拜稽首，乃卒。是以爲恭世子也。

魯人有朝祥而暮歌者。子路笑之。夫子曰：由爾責於人，終無已夫。二年之喪，亦已久矣。夫子路出，夫子曰：又多乎哉。踰月則其善也。

魯莊公及宋人戰于乘丘。縣賁父御，卜國爲右。馬驚敗績。公隊，佐車授綏。公曰：末之卜也。縣賁父曰：他日不敗績，而今敗績，是無勇也。遂死之。圉人浴馬，有流矢在白肉。公曰：非其罪也。遂誅之。士之有誅，自此始也。

五經白文 禮一 三
曾子寢疾病樂正子春坐於牀下曾元曾申坐
於足童子隅坐而執燭節童子曰華而睨大
夫之簀與子春曰止曾子聞之瞿然曰呼曰
華而睨大夫之簀與曾子曰然斯季孫之賜
也我未之能易也元起易簀曾元曰夫子之
病革矣不可以變幸而至於旦請敬易之曾
子曰爾之愛我也不如彼君子之愛人也以
德細人之愛人也以姑息吾何求哉吾得正

而斃焉斯已矣舉扶而易之反席未安而沒
始死充充如有窮既殯瞿瞿如有求而弗得既
葬皇皇如有望而弗至練而慨然祥而廓然
邾婁復之以矢蓋自戰於升陘始也節魯婦人
之鬢而弔也自敗於臺鮒始也

南宮縚之妻之姑之喪夫子誨之鬢曰爾毋從
從爾爾毋扈扈爾蓋榛以爲笄長尺而總八
寸

孟獻子禫。縣而不樂。比御而不入。夫子曰：獻子加於人一等矣。節。孔子既祥，五日彈琴而不成聲，十日而成笙歌。有子蓋既祥而絲屨組纓。死而不弔者三：畏厭溺。

子路有姊之喪，可以除之矣，而弗除也。孔子曰：何弗除也？子路曰：吾寡兄弟而弗忍也。孔子曰：先王制禮，行道之人皆弗忍也。子路聞之。

遂除之。

太公封於營丘，比及五世，皆反葬於周。君子曰：樂樂其所自生，禮不忘其本。古之人有言曰：狐死正丘首，仁也。

伯魚之母死，期而猶哭。夫子聞之曰：誰與哭者？門人曰：鯉也。夫子曰：嘻，其甚也。伯魚聞之，遂除之。

舜葬於蒼梧之野，蓋二妃未之從也。季武子曰：

周公蓋祔

曾子之喪浴於爨室

大功廢業或曰大功誦可也

子張病召申祥而語之曰君子曰終小人曰死

吾今日其庶幾乎

曾子曰始死之奠其餘閣也與

曾子曰小功不為位也者是委巷之禮也子思

之哭嫂也為位婦人倡踊申祥之哭言思也

亦然

古者冠縮縫今也衡縫故喪冠之反吉非古也

曾子謂子思曰伋吾執親之喪也水漿不入於

口者七日子思曰先王之制禮也過之者俯

而就之不至焉者跂而及之故君子之執親

之喪也水漿不入於口者三日杖而后能起

曾子曰小功不稅則是遠兄弟終無服也而可

乎

赴與
訃同

伯高之喪。孔氏之使者未至。冉子攝束帛乘馬而將之。孔子曰：異哉！徒使我不誠於伯高。伯高死於衛，赴於孔子。孔子曰：吾惡乎哭諸？兄弟，吾哭諸廟；父之友，吾哭諸廟門之外；師，吾哭諸寢；朋友，吾哭諸寢門之外。所知，吾哭諸野。於野則已，䟽於寢則已重。夫由賜也見我，吾哭諸賜氏。遂命子貢為之主，曰：為爾哭也。來者拜之，知伯高而來者勿拜也。

曾子曰：喪有疾，食肉飲酒，必有草木之滋焉，以為薑桂之謂也。

子夏喪其子而喪其明，曾子弔之曰：吾聞之也，朋友喪明則哭之。曾子哭，子夏亦哭曰：天乎！予之無罪也。曾子怒曰：商女何無罪也？吾與女事夫子於洙泗之間，退而老於西河之上，使西河之民疑女於夫子，爾罪一也。喪爾親，使民未有聞焉，爾罪二也。喪爾子，喪爾明，爾

罪三也。而曰爾何無罪與？子夏投其杖而拜曰：吾過矣。吾過矣。吾離羣而索居亦已久矣。夫晝居於內，問其疾可也；夜居於外，弔之可也。是故君子非有大故，不宿於外，非致齊也，非疾也不晝夜居於內。

高子臯之執親之喪也，泣血三年，未嘗見齒。君子以爲難。

衰與其不當物也，寧無衰。齊衰不以邊坐，大功不以服勤。

孔子之衛，遇舊館人之喪，入而哭之，哀。出使子貢說驂而賻之。子貢曰：於門人之喪，未有所說。驂說驂於舊館，無乃已重乎？夫子曰：予鄉者入而哭之，遇於一哀而出涕。予惡夫涕之無從也。小子行之。

孔子在衛，有送葬者，而夫子觀之，曰：善哉。爲喪乎？足以爲法矣。小子識之。子貢曰：夫子何善

爾也。曰：其往也如慕，其反也如疑。子貢曰：豈若速反而虞乎？子曰：小子識之，我未之能行也。

顏淵之喪，饋祥肉，孔子出受之，入彈琴而后食之。節。孔子與門人立，拱而尚右，二三子亦皆尚右。孔子曰：二三子之嗜學也，我則有姊之喪故也。二三子皆尚左。

孔子蚤作，負手曳杖，消搖於門，歌曰：泰山其頽乎？梁木其壞乎？哲人其萎乎？既歌而入，當戶而坐。子貢聞之曰：泰山其頽，則吾將安仰？梁木其壞，哲人其萎，則吾將安放？夫子殆將病也。遂趨而入。節。夫子曰：賜，爾來何遲也？夏后氏殯於東階之上，則猶在阼也；殷人殯於兩楹之間，則與賓主夾之也；周人殯於西階之上，則猶賓之也。而丘也殷人也，予疇昔之夜，夢坐奠於兩楹之間。夫明王不興，而天下其

孰能宗予。予殆將死也。蓋寢疾七日而沒。

孔子之喪。門人疑所服。子貢曰。昔者夫子之喪。

顏淵若喪子而無服。喪子路亦然。請喪夫子。

若喪父而無服。

孔子之喪。公西赤為志焉。飾棺。牆置翣。設披。周

也。設崇。殷也。綢練設施。夏也。

子張之喪。公明儀為志焉。褚幕丹質。蟻結于四

隅。殷士也。

子夏問於孔子曰。居父母之仇。如之何。夫子曰。

寢苦枕干。不仕。弗與共天下也。遇諸市朝。不

反兵而鬪。節曰。請問居昆弟之仇。如之何。曰。

仕。弗與共國。銜君命而使。雖遇之。不鬪。曰。請

問。居從父昆弟之仇。如之何。曰。不為魁。主人

能。則執兵而陪其後。

孔子之喪。二三子皆經而出。羣居則經。出則否。

易墓。非古也。

子路曰吾聞諸夫子喪禮與其哀不足而禮有餘也不若禮不足而哀有餘也祭禮與其敬不足而禮有餘也不若禮不足而敬有餘也曾子弔於負夏主人既祖填池推柩而反之降婦人而后行禮從者曰禮與曾子曰夫祖者且也且胡爲其不可以反宿也節從者又問諸子游曰禮與子游曰飯於牖下小斂於戶內大斂於阼殯於客位祖於庭葬於墓所以

卽遠也故喪事有進而無退曾子聞之曰多矣乎予出祖者

曾子襲裘而弔子游裼裘而弔曾子指子游而示人曰夫夫也爲習於禮者如之何其裼裘而弔也主人旣小斂袒括髮子游趨而出襲裘帶經而入曾子曰我過矣我過矣夫夫是也

子夏旣除喪而見予之琴和之而不和彈之而

不成聲作而曰哀未忘也先王制禮而弗敢
過也子張既除喪而見予之琴和之而和彈
之而成聲作而曰先王制禮不敢不至焉
司寇惠子之喪子游爲之麻衰牡麻絰文子辭
曰子辱與彌牟之弟游又辱爲之服敢辭子
游曰禮也節文子退反哭子游趨而就諸臣
之位文子又辭曰子辱與彌牟之弟游又辱
爲之服又辱臨其喪敢辭子游曰固以請文

子退扶適子南面而立曰子辱與彌牟之弟
游又辱爲之服又辱臨其喪虎也敢不復位
子游趨而就客位

將軍文子之喪既除喪而后越人來弔主人深
衣練冠待于廟垂涕洟子游觀之曰將軍文
氏之子其庶幾乎亡於禮者之禮也其動也
中

亡與
無通

幼名冠字五十以伯仲死諡周道也

五經白文
禮記
經也者實也。

掘中霤而浴。毀竈以綴足。節及葬。毀宗躐行。出

于大門。殷道也。學者行之。

子柳之母死。子碩請具。子柳曰。何以哉。子碩曰。請粥庶弟之母。子柳曰。如之何其粥人之母。以葬其母也。不可。既葬。子碩欲以賻布之餘具祭器。子柳曰。不可。吾聞之也。君子不家於喪。請班諸兄弟之貧者。

君子曰。謀人之軍師。敗則死之。謀人之邦邑。危則亡之。

公叔文子升於瑕丘。蘧伯玉從。文子曰。樂哉斯丘也。死則我欲葬焉。蘧伯玉曰。吾子樂之。則瑗請前。

弁人有其母死而孺子泣者。孔子曰。哀則哀矣。而難爲繼也。夫禮爲可傳也。爲可繼也。故哭踊有節。

叔孫武叔之母死既小斂舉者出尸出戶袒且投其冠括髮子游曰知禮

扶君卜人師扶右射人師扶左君薨以是舉

從母之夫舅之妻二夫人相為服君子未之言也或曰同鬢總

喪事欲其縱縱爾吉事欲其折折爾故喪事雖

遽不陵節吉事雖止不怠故騷騷爾則野鼎

鼎爾則小人君子蓋猶猶爾

喪具君子耻具一日二日而可為也者君子弗

為也

喪服兄弟之子猶子也蓋引而進之也嫂叔之

無服也蓋推而遠之也姑姊妹之薄也蓋有

受我而厚之者也

食於有喪者之側未嘗飽也

曾子與客立於門側其徒趨而出曾子曰爾將

何之曰吾父死將出哭於巷曰反哭於爾次

曾子北面而弔焉。

孔子曰之。死而致死之。不仁而不可爲也。之死而致生之。不知而不可爲也。是故竹不成用。瓦不成味。木不成斲。琴瑟張而不平。竽笙備而不和。有鐘磬而無篋虞。其曰明器。神明之也。

有子問於曾子曰。問喪於夫子乎。曰。聞之矣。喪欲速貧。死欲速朽。有子曰。是非君子之言也。

曾子曰。參也聞諸夫子也。有子又曰。是非君子之言也。曾子曰。參也與子游聞之。有子曰。然。然則夫子有爲言之也。曾子以斯言告於子游。子游曰。甚哉。有子之言似夫子也。昔者夫子居於宋。見桓司馬。自爲石槨。三年而不成。夫子曰。若是其靡也。死不如速朽之愈也。死之欲速朽。爲桓司馬言之也。節南宮敬叔反。必載寶而朝。夫子曰。若是其貨也。喪不如

速貧之愈也。喪之欲速貧，爲敬叔言之也。節
曾子以子游之言告於有子，有子曰：「然，吾固
曰：非夫子之言也。」曾子曰：「子何以知之？」有子
曰：「夫子制於中都，四寸之棺，五寸之槨，以斯
知不欲速朽也。昔者夫子失魯司寇，將之荆，
蓋先之以子夏，又申之以冉有，以斯知不欲
速貧也。」

陳莊子死，赴於魯，魯人欲勿哭，繆公名縣子而
問焉。縣子曰：「古之大夫束脩之間，不出竟，雖
欲哭之，安得而哭之？」節。今之大夫交政於中
國，雖欲勿哭焉，得而弗哭，且臣聞之：哭有二
道，有愛而哭之，有畏而哭之。公曰：「然，然則如
之何而可？」縣子曰：「請哭諸異姓之廟。」於是與
哭諸縣氏。

仲憲言於曾子曰：「夏后氏用明器，示民無知也。
殷人用祭器，示民有知也。周人兼用之，示民

疑也。曾子曰：其不然乎？其不然乎？夫明器，鬼器也。祭器，人器也。夫古之人，胡爲而死其親乎？

公叔木有同母異父之昆弟死，問於子游。子游曰：其大功乎？狄儀有同母異父之昆弟死，問於子夏。子夏曰：我未之前聞也。魯人則爲之齊衰，狄儀行齊衰，今之齊衰，狄儀之問也。子思之母死於衛，柳若謂子思曰：子聖人之後

大也。四方於子乎？觀禮。子蓋慎諸？子思曰：吾何慎哉？吾聞之，有其禮，無其財，君子弗行也。有其禮，有其財，無其時，君子弗行也。吾何慎哉？縣子瑣曰：吾聞之，古者不降，上下各以其親。滕伯文爲孟虎齊衰，其叔父也。爲孟皮齊衰，其叔父也。

后木曰：喪，吾聞諸縣子曰：夫喪不可不深長思也。買棺外內易，我死則亦然。

曾子曰尸未設飾故帷堂小斂而徹帷仲梁子
曰夫婦方亂故帷堂小斂而徹帷

小斂之奠子游曰於東方曾子曰於西方斂斯
席矣小斂之奠在西方魯禮之末失也

縣子曰綌衰總裳非古也

子蒲卒哭者呼滅子臯曰若是野哉哭者改之
杜橋之母之喪宮中無相以為沽也

夫子曰始死羔裘玄冠者易之而已羔裘玄冠

夫子不以弔

子游問喪具夫子曰稱家之有亡子游曰有無

惡乎齊夫子曰有毋過禮苟亡矣斂手足形

還葬縣棺而封人豈有非之者哉

司士賁告於子游曰請襲於牀子游曰諾縣子

聞之曰汰哉叔氏專以禮許人

宋襄公葬其夫人醯醢百甕曾子曰既曰明器
矣而又實之

孟獻子之喪司徒旅歸四布夫子曰可也
讀贈曾子曰非古也是再告也

成子高寢疾慶遺入請曰子之病革矣如至乎
大病則如之何節子高曰吾聞之也生有益
於人死不害於人吾縱生無益於人吾可以
死害於人乎哉我死則擇不食之地而葬我
焉

子夏問諸夫子曰居君之母與妻之喪居處言

語飲食術爾

賓客至無所館夫子曰生於我乎館死於我乎
殯

國子高曰葬也者藏也藏也者欲人之弗得見
也是故衣足以飾身棺周於衣槨周於棺土
周於槨反壤樹之哉

孔子之喪有自燕來觀者舍於子夏氏子夏曰
聖人之葬人與人之葬聖人也子何觀焉節

昔者夫子言之曰吾見封之若堂者矣見若
 坊者矣見若覆夏屋者矣見若斧者矣從若
 斧者焉馬鬣封之謂也今日而三斬板而
 已封尚行夫子之志乎哉
 婦人不葛帶
 有薦新如朔奠

既葬各以其服除
 池視重霤

君即位而為柩歲一漆之藏焉
 復楔齒綴足飯設飾帷堂竝作

父兄命赴者
 君復於小寢大寢小祖大祖庫門四郊
 喪不剝奠也與祭肉也與

既殯旬而布材與明器
 父母之喪哭無時使必知其反也

練練衣黃裏繚緣節葛要經繩屨無絢節角瑱

節鹿裘衡長祛祛裼之可也

有殯聞遠兄弟之喪雖總必往非兄弟雖鄰不

往

所識其兄弟不同居者皆弔

天子之棺四重水兕革棺被之其厚三寸槨棺

一梓棺二四者皆周節棺束縮二衡三衽每

束一節柏椁以端長六尺

天子之哭諸侯也爵弁經紵衣節或曰使有司

哭之節為之不以樂食

天子之殯也敢塗龍輅以椁加斧于椁上畢塗

屋天子之禮也

唯天子之喪有別姓而哭

魯哀公誅孔丘曰天不遺耆老莫相予位焉嗚

呼哀哉尼父

國亡大縣邑公卿大夫士皆厭冠哭於大廟三

日君不舉或曰君舉而哭於后土

孔子惡野哭者。

未仕者不敢稅人。如稅人則以父兄之命。

士備入而后朝夕踊。

祥而縞。是月禫。徙月樂。

君於士有賜布。

檀弓下第四

君之適長殤車三乘。公之庶長殤車一乘。大夫

之適長殤車一乘。

公之喪。諸達官之長杖。

君於大夫將葬。弔於宮。及出。命引之。三步則止。

如是者三。君退朝亦如之。哀次亦如之。

五十無車者。不越疆而弔人。

季武子寢疾。疇固不說齊衰而入。見曰。斯道也。

將亡矣。士唯公門說齊衰。武子曰。不亦善乎。

君子表微。及其喪也。曾點倚其門而歌。

大夫弔。當事而至。則辭焉。弔於人。是日不樂。婦

人不越疆而弔人行弔之日不飲酒食肉焉

弔於葬者必執引若從柩及壙皆執紼

喪公弔之必有拜者雖朋友州里舍人可也弔

曰寡君承事主人曰臨

君遇柩於路必使人弔之人

大夫之喪庶子不受弔

妻之昆弟為父後者死哭之適室子為主袒免

哭踊夫入門右使人立於門外告來者狎則

入哭父在哭於妻之室非為父後者哭諸異

室

有殯聞遠兄弟之喪哭于側室無側室哭於門

內之右同國則往哭之

子張死曾子有母之喪齊衰而往哭之或曰齊

衰不以弔曾子曰我弔也與哉

有若之喪悼公弔焉子游擯由左

齊穀王姬之喪魯莊公為之大功或曰由魯嫁

穀讀為告

故為之服姊妹之服或曰外祖母也故為之服

晉獻公之喪秦穆公使人弔公子重耳且曰寡人聞之亡國恒於斯得國恒於斯雖吾子儼然在憂服之中喪亦不可久也時亦不可失也孺子其圖之節以告舅犯舅犯曰孺子其辭焉喪人無寶仁親以為寶父死之謂何又因以為利而天下其孰能說之孺子其辭焉

顯讀
為鞮

節公子重耳對客曰君惠弔亡臣重耳身喪父死不得與於哭泣之哀以為君憂父死之謂何或敢有他志以辱君義稽顙而不拜哭而起起而不私節子顯以致命於穆公穆公曰仁夫公子重耳夫稽顙而不拜則未為後也故不成拜哭而起則愛父也起而不私則遠利也
惟殯非古也自敬姜之哭穆伯始也

喪禮哀戚之至也。節哀順變也。君子念始之者也。節復盡愛之道也。有禱祠之心焉。望反諸幽。求諸鬼神之道也。北面求諸幽之義也。節拜稽顙。哀戚之至。隱也。稽顙。隱之甚也。節飯用米貝。弗忍虛也。不以食道。用美焉爾。節銘。明旌也。以死者為不可別已。故以其旗識之。愛之。斯錄之矣。敬之。斯盡其道焉耳。節重。主道也。殷主綴重焉。周主重徹焉。節奠以素器。

以生者有哀素之心也。唯祭祀之禮。主人自盡焉。爾豈知神之所饗。亦以主人有齊敬之心也。節辟踊。哀之至也。有筭為之節文也。節袒括髮。變也。慍。哀之變也。去飾去美也。袒括髮。去飾之甚也。有所袒。有所襲。哀之節也。節弁經葛而葬。與神交之道也。有敬心焉。周人弁而葬。殷人冔而葬。歆。主人主婦室老。為其病也。君命食之也。節反

哭升堂反諸其所作也主婦入于室反諸其所養也

反哭之弔也哀之至也反而亡焉失之矣於是

為甚節殷既封而弔周反哭而弔孔子曰殷

已慤吾從周

葬於北方北首三代之達禮也之幽之故也節

既封主人贈而祝宿虞尸節既反哭主人與

有司視虞牲有司以几筵舍奠於墓左反日

封當為寔下同

宿讀為肅

舍讀為釋

中而虞節葬日虞弗忍一日離也節是日也

以虞易奠卒哭曰成事節是日也以吉祭易

喪祭明日祔于祖父節其變而之吉祭也比

至於祔必於是日也接不忍一日未有所歸

也節殷練而祔周卒哭而祔孔子善殷

君臨臣喪以巫祝桃茢執戈惡之也所以異於

生也喪有死之道焉先王之所難言也

喪之朝也順死者之孝心也其哀離其室也故

至於祖考之廟而后行殷朝而殯於祖周朝而遂葬

孔子謂爲明器者知喪道矣備物而不可用也節哀哉死者而用生者之器也不殆於用殉乎哉節其曰明器神明之也塗車芻靈自古有之明器之道也孔子謂爲芻靈者善謂爲俑者不仁不殆於用人乎哉

穆公問於子思曰爲舊君反服古與子思曰古

之君子進人以禮退人以禮故有舊君反服之禮也今之君子進人若將加諸膝退人若將隊諸淵毋爲戎首不亦善乎又何反服之禮之有

悼公之喪季昭子問於孟敬子曰爲君何食敬子曰食粥天下之達禮也節吾二臣者之不能居公室也四方莫不聞矣勉而爲瘠則吾能毋乃使人疑夫不以情居瘠者乎哉我則

食食。

衛司徒敬子死。子夏弔焉。主人未小斂。經而往。子游弔焉。主人既小斂。子游出。經反哭。子夏曰。聞之也。與曰。聞諸夫子。主人未改服。則不

經。

曾子曰。晏子可謂知禮也。已。恭敬之有焉。有若曰。晏子一狐裘三十年。遣車一乘。及墓而反。節。國君七介。遣車七乘。大夫五介。遣車五乘。

晏子焉知禮。節。曾子曰。國無道。君子耻盈禮。

焉。國奢則示之以儉。國儉則示之以禮。

國昭子之母死。問於子張曰。葬及墓。男子婦人

安位。子張曰。司徒敬子之喪。夫子相。男子西

鄉。婦人東鄉。節。曰。噫。母曰。我喪也。斯沾。爾專

之。賓為賓焉。主為主焉。婦人從男子。皆西鄉。

穆伯之喪。敬姜晝哭。文伯之喪。晝夜哭。孔子曰。

知禮矣。

沾讀
為規

為搖

文伯之喪敬姜據其牀而不哭曰昔者吾有斯子也吾以將為賢人也吾未嘗以就公室今及其死也朋友諸臣未有出涕者而內人皆行哭失聲斯子也必多曠於禮矣夫

季康子之母死陳褻衣敬姜曰婦人不飾不敢見舅姑將有四方之賓來褻衣何為陳於斯命徹之

有子與子游立見孺子慕者有子謂子游曰予

猶當為搖

壹不知夫喪之踊也予欲去之久矣情在於斯其是也夫節子游曰禮有微情者有以故興物者有直情而徑行者戎狄之道也禮道則不然節人喜則斯陶陶斯咏咏斯猶猶斯舞舞斯愠愠斯戚戚斯歎歎斯辟辟斯踊矣品節斯斯之謂禮節人死斯惡之矣無能也斯倍之矣是故制絞衾設萋翣為使人勿惡也節始死脯醢之奠將行遣而行之既葬而

食之未有見其饗之者也。自上世以來未之有舍也。為使人勿倍也。故子之所刺於禮者亦非禮之訾也。

吳侵陳。斬祀殺厲。師還出竟。陳太宰嚭使於師。夫差謂行人儀曰：是夫也多言。盍嘗問焉。師必有名。人之稱斯師也者。則謂之何。節太宰嚭曰：古之侵伐者。不斬祀。不殺厲。不獲二毛。今斯師也。殺厲與其不謂之殺厲之師與。曰。

反爾地歸爾子。則謂之何。曰：君王討敝邑之罪。又矜而赦之。師與有無名乎。

顏丁善居喪。始死。皇皇焉。如有求而弗得。及殯。望望焉。如有從而弗及。既葬。慨焉。如不及其反而息。

子張問曰：書云。高宗三年不言。言乃讙。有諸。仲尼曰：胡為其不然也。古者天子崩。王世子聽於冢宰三年。

知悼子卒未葬平公飲酒師曠李調侍鼓鐘杜
蕢自外來聞鐘聲曰安在曰在寢杜蕢入寢
下歷階而升酌曰曠飲斯又酌曰調飲斯又酌
堂上北面坐飲之降趨而出節平公呼而進
之曰蕢曩者爾心或開予是以不與爾言爾
飲曠何也曰子卯不樂知悼子在堂斯其爲
子卯也大矣曠也太師也不以詔是以飲之
也節爾飲調何也曰調也君之褻臣也爲一

飲一食忘君之疾是以飲之也節爾飲何也
曰蕢也宰夫也非刀匕是共又敢與知防是
以飲之也節平公曰寡人亦有過焉酌而飲
寡人杜蕢洗而揚觶公謂侍者曰如我死則
必毋廢斯爵也至于今旣畢獻斯揚觶謂之
杜舉
公叔文子卒其子戍請諡於君曰日月有時將
葬矣請所以易其名者節君曰昔者衛國凶

饑夫子為粥與國之餓者是不亦惠乎昔者
 衛國有難夫子以其死衛寡人不亦貞乎夫
 子聽衛國之政脩其班制以與四鄰交衛國
 之社稷不辱不亦文乎故謂夫子貞惠文子
 石駘仲卒無適子有庶子六人卜所以為後者
 曰沐浴佩玉則兆五人者皆沐浴佩玉石祁
 子曰孰有執親之喪而沐浴佩玉者乎不沐
 浴佩玉石祁子兆衛人以龜為有知也

陳子車死於衛其妻與其家大夫謀以殉葬定
 而后陳子亢至以告曰夫子疾莫養於下請
 以殉葬節子亢曰以殉葬非禮也雖然則彼
 疾當養者孰若妻與宰得已則吾欲已不得
 已則吾欲以二子者之為之也於是弗果用
 子路曰傷哉貧也生無以為養死無以為禮也
 孔子曰啜菽飲水盡其歡斯之謂孝歛首足
 形還葬而無槨稱其財斯之謂禮

衛獻公出奔反於衛及郊將班邑於從者而后入柳莊曰如皆守社稷則孰執羈勒而從如皆從則孰守社稷君反其國而有私也母乃不可乎弗果班

衛有大史曰柳莊寢疾公曰若疾革雖當祭必告公再拜稽首請於尸曰有臣柳莊也者非寡人之臣社稷之臣也聞之死請往不釋服而往遂以祔之與之邑裘氏與縣潘氏書而

納諸棺曰世世萬子孫毋變也

陳乾昔寢疾屬其兄弟而命其子尊已曰如我死則必大爲我棺使吾一婢子夾我陳乾昔死其子曰以殉葬非禮也况又同棺乎弗果殺

仲遂卒于垂壬午猶繹萬入去籥仲尼曰非禮也卿卒不繹

季康子之母死公輸若方小斂般請以機封將

重當
爲童

五經白文
禮一
卒
從之。公肩假曰：不可。夫魯有初。節公室視豐碑。三家視桓楹。節般。爾以人之母嘗巧，則豈不得以其母以嘗巧者乎？則病者乎？噫，弗果從。

戰于郎。公叔禺人遇負杖入保者息曰：使之雖病也，任之雖重也。君子不能爲謀也。士弗能死也，不可。我則旣言矣。與其鄰重汪錡往，皆死焉。魯人欲勿殤，重汪錡問於仲尼。仲尼曰：

能執干戈以衛社稷，雖欲勿殤也，不亦可乎？子路去魯，謂顏淵曰：何以贈我？曰：吾聞之也。去國則哭于墓而后行，反其國不哭。展墓而入，謂子路曰：何以處我？子路曰：吾聞之也。過墓則式，過祀則下。

工尹商陽與陳弃疾追吳師，及之。陳弃疾謂工尹商陽曰：王事也，子手弓而可，手弓，子射諸射之斃一人，韞弓，又及，謂之，又斃一人，每斃

一人揜其目止其御曰朝不坐燕不與殺三人亦足以反命矣孔子曰殺人之中又有禮焉

諸侯伐秦曹桓公卒于會諸侯請舍使之襲襄公朝于荆康王卒荆人曰必請襲魯人曰非禮也荆人強之巫先拂柩荆人悔之滕成公之喪使子叔敬叔弔進書子服惠伯為介及郊為懿伯之忌不入惠伯曰政也不可

辟讀為闢

奪讀為兌

以叔父之私不將公事遂入

哀公使人弔蕢尚遇諸道辟於路畫宮而受弔焉節曾子曰蕢尚不如杞梁之妻之知禮也齊莊公襲莒于奪杞梁死焉其妻迎其柩於路而哭之哀節莊公使人弔之對曰君之臣不免於罪則將肆諸市朝而妻妾執君之臣免於罪則有先人之敝廬在君無所辱命孺子躓之喪哀公欲設撥問於有若有若曰其

禮記卷之五十五
禮一
可也。君之二三臣猶設之。顏柳曰：天子龍輅而
椁，諸侯輅而設幃，爲榆沈。故設撥。三臣者
廢輅而設撥，竊禮之不中者也。而君何學焉。
悼公之母死，哀公爲之齊衰。有若曰：爲妾齊衰，
禮與。公曰：吾得已乎哉。魯人以妻我。
季子臯葬其妻，犯人之禾。申祥以告曰：請庚之。
子臯曰：孟氏不以是罪予，朋友不以是棄予，
以吾爲邑長於斯也。買道而葬，後難繼也。

仕而未有祿者，君有饋焉曰獻，使焉曰寡君。違
而君薨，弗爲服也。

虞而立尸，有几筵。節卒哭而諱，生事畢而鬼事
始已。節既卒哭，宰夫執木鐸以命于官曰：舍
故而諱，新自寢門至於庫門。
二名不偏諱，夫子之母名徵，在言在不稱，徵言
徵不稱在。

軍有憂則素服，哭于庫門之外，赴車不載，橐鞬

有焚其先人之室則三日哭故曰新宮火亦三日哭

孔子過泰山側有婦人哭於墓者而哀夫子式而聽之使子路問之曰子之哭也壹似重有憂者而曰然昔者吾舅死於虎吾夫又死焉今吾子又死焉夫子曰何爲不去也曰無苛政夫子曰小子識之苛政猛於虎也

魯人有周豐也者哀公執摯請見之而曰不可公曰我其已夫使人問焉曰有虞氏未施信於民而民信之夏后氏未施敬於民而民敬之何施而得斯於民也對曰墟墓之間未施哀於民而民哀社稷宗廟之中未施敬於民而民敬殷人作誓而民始畔周人作會而民始疑苟無禮義忠信誠慤之心以涖之雖固結之民其不解乎

喪不慮居毀不危身喪不慮居爲無廟也毀不

危身為無後也

延陵季子適齊於其反也其長子死葬於贏博之間孔子曰延陵季子吳之習於禮者也往而觀其葬焉節其坎深不至於泉其斂以時服既葬而封廣輪揜坎其高可隱也既封左祖右還其封且號者三曰骨肉歸復于土命也若魂氣則無不之也無不之也而遂行孔子曰延陵季子之於禮也其合矣乎

邾婁考公之喪徐君使容居來弔含曰寡君使容居坐含進侯玉其使容居以含節有司曰諸侯之來辱敝邑者易則易于則于易于雜者未之有也節容居對曰容居聞之事君不敢忘其君亦不敢遺其祖昔我先君駒王西討濟於河無所不用斯言也容居魯人也不敢忘其祖

子思之母死於衛赴於子思子思哭於廟門人

至曰庶氏之母死何爲哭於孔氏之廟乎子思曰吾過矣吾過矣遂哭於他室

天子崩三日祝先服五日官長服七日國中男女服三月天下服

虞人致百祀之木可以爲棺槨者斬之不至者廢其祀勿其人

齊大饑黔敖爲食於路以待餓者而食之有餓者蒙袂輯屨貿貿然來黔敖左奉食右執飲

曰嗟來食揚其目而視之曰予唯不食嗟來之食以至於斯也從而謝焉終不食而死曾子聞之曰微與其嗟也可去其謝也可食邾婁定公之時有弑其父者有司以告公瞿然失席曰是寡人之罪也曰寡人嘗學斷斯獄矣臣弑君凡在官者殺無赦子弑父凡在官者殺無赦殺其人壞其室洿其宮而瀦焉蓋君踰月而后舉爵

京當
作原

晉獻文子成室。晉大夫發焉。張老曰：美哉輪焉，美哉奐焉。歌於斯，哭於斯，聚國族於斯。文子曰：武也得歌於斯，哭於斯，聚國族於斯，是全要領以從先大夫於九京也。北面再拜稽首。君子謂之善頌善禱。

仲尼之畜狗死，使子貢埋之。曰：吾聞之也。敝帷不棄，為埋馬也。敝蓋不棄，為埋狗也。丘也貧，無蓋於其封也。亦予之席，毋使其首陷焉。

路馬死埋之以帷。

季孫之母死，哀公弔焉。曾子與子貢弔焉。闈人為君在弗內也。曾子與子貢入於其廄而脩容焉。子貢先入，闈人曰：鄉者已告矣。曾子後入，闈人辟之。節。涉內，雷卿大夫皆辟位，公降一等而揖之。君子言之曰：盡飾之道，斯其行者遠矣。

陽門之介夫死，司城子罕入而哭之哀。晉人之

覘宋者反報於晉侯曰陽門之介夫死而子
 罕哭之哀而民說殆不可伐也節孔子聞之
 曰善哉覘國乎詩云凡民有喪扶服救之雖
 微晉而已天下其孰能當之六晉魯公
 魯莊公之喪既葬而經不入庫門士大夫既卒
 哭麻不入

孔子之故人曰原壤其母死夫子助之沐椁原
 壤登木曰久矣予之不託於音也歌曰貍首

卷與
奉同

之斑然執女手之卷然夫子為弗聞也者而
 過之從者曰子未可以已乎夫子曰丘聞之
 親者毋失其為親也故者毋失其為故也
 趙文子與叔譽觀乎九原文子曰死者如可作
 也吾誰與歸節叔譽曰其陽處父乎文子曰
 行并植於晉國不沒其身其知不足稱也節
 其舅犯乎文子曰見利不顧其君其仁不足
 稱也節我則隨武子乎利其君不忘其身謀

其身不遺其友。晉人謂文子知人。節文子其中退然如不勝衣。其言呐呐然如不出諸其口。節所舉於晉國管庫之士七十有餘家。生不交利。死不屬其子焉。其子曰：叔仲皮學子柳。叔仲皮死。其妻魯人也。衣衰而繆經。叔仲衍以告。請總衰而環經。曰：昔者吾喪姑姊妹亦如斯。未吾禁也。退使其妻總衰而環經。

卷一

成人有其兄死而不為衰者。聞子臯將為成宰。遂為衰。成人曰：蠶則績而蟹有匡。范則冠而蟬有綏。兄則死而子臯為之衰。

樂正子春之母死。五日而不食。曰：吾悔之。自吾母而不得吾情。吾惡乎用其情。

歲旱。穆公召縣子而問。然曰：天久不雨。吾欲暴尪而奚若。節曰：天則不雨。而暴人之疾子。虐母乃不可與。節然則吾欲暴巫而奚若。節曰：

天則不雨而望之愚婦人於以求之母乃已
疏乎節徙市則奚若曰天子崩巷市七日諸
侯薨巷市三日為之徙市不亦可乎

孔子曰衛人之祔也離之魯人之祔也合之善
夫

王制第五

王者之制祿爵公侯伯子男凡五等節諸侯之
次上大夫卿下大夫上士中士下士凡五等節

天子之田方千里公侯田方百里伯七十里
子男五十里不能五十里者不合於天子附
於諸侯曰附庸節天子之三公之田視公侯
天子之卿視伯天子之大夫視子男天子之
元士視附庸節制農田百畝百畝之分上農
夫食九人其次食八人其次食七人其次食
六人下農夫食五人庶人在官者其祿以是
為差也節諸侯之下士視上農夫祿足以代

其耕也。中士倍下士，上士倍中士，下大夫倍上士，卿四大夫祿，君十卿祿。節次國之卿三大夫祿，君十卿祿，小國之卿倍大夫祿，君十卿祿。節

次國之上卿位當大國之中，中當其下，下當其上，大夫小國之上卿位當大國之下卿，中當其上，大夫下當其下，大夫。節其有中士下士者，數各居其上之三分。

凡四海之內九州，州方千里，州建百里之國三十，七十里之國六十，五十里之國百有二十，凡二百一十國，名山大澤不以封，其餘以為附庸，間田八州，州二百一十國。節天子之縣內方百里之國九，七十里之國二十有一，五十里之國六十有三，凡九十三國，名山大澤不以盼，其餘以祿士以為間田。節凡九州千七百七十三國，天子之元士諸侯之附庸不

與

天子百里之內以共官。千里之內以爲御。
千里之外設方伯。五國以爲屬。屬有長。十國以
爲連。連有帥。三十國以爲卒。卒有正。二百一
十國以爲州。州有伯。八州八伯。五十六正。百
六十八帥。三百三十六長。八伯各以其屬。屬
於天子之老二人。分天下以爲左右。曰二伯。
千里之內曰甸。千里之外曰采。曰流。

天子三公九卿二十七大夫八十一元士。節大
國三卿皆命於天子。下大夫五人。上士二十
七人。次國三卿二卿命於天子。一卿命於其
君。下大夫五人。上士二十七人。小國二卿皆
命於其君。下大夫五人。上士二十七人。
天子使其大夫爲三監。監於方伯之國。國三人。
天子之縣內諸侯祿也。外諸侯嗣也。
制三公一命卷。若有加則賜也。不過九命。節次

諸國之君不過七命。小國之君不過五命。大國
 天之卿不過三命。下卿再命。小國之卿與下大
 大夫一命。大夫一命。士一命。凡官民材必先論之。論辨然後使之任事。然後
 爵之位定。然後祿之。爵人於朝。與士共之。刑
 人於市。與衆棄之。節是故公家不畜刑人。大
 夫弗養。士遇之塗。弗與言也。屏之四方。唯其
 天所之不及。以政示弗故生也。

諸侯之於天子也。比年一小聘。三年一大聘。五
 年一朝。節天子五年一巡守。節歲二月東巡
 守。至于岱宗。柴而望祀山川。覲諸侯。問百年
 者。就見之。節命大師陳詩以觀民風。命市納
 賈以觀民之所好惡。志淫好辟。節命典禮。考
 時月。定日。同律禮樂。制度衣服。正之。節山川
 神祇有不舉者。為不敬。不敬者君削以地。節
 宗廟有不順者。為不孝。不孝者君紕以爵。節

變禮易樂者為不從。不從者君流。革制度衣服者為畔。畔者君討。節有功德於民者加地。節進律。節五月南巡守。至于南嶽。如東巡守之禮。八月西巡守。至于西嶽。如南巡守之禮。十一月北巡守。至于北嶽。如西巡守之禮。歸假于祖禰。用特。節天子將出。類乎上帝。宜乎社。造乎禰。諸侯將出。宜乎社。造乎禰。節天子無事。與諸侯相見曰朝。考禮正刑。一德以尊。

于天子。

天子賜諸侯樂。則以祝將之。賜伯子男樂。則以鼗將之。節諸侯賜弓矢。然後征。賜鈇鉞。然後殺。節賜圭瓚。然後為鬯。未賜圭瓚。則資鬯於天子。節天子命之教。然後為學。小學在公宮南之左。大學在郊。天子曰辟雍。諸侯曰頴宮。天子將出征。類乎上帝。宜乎社。造乎禰。禡於所征之地。受命於祖。受成於學。節出征。執有罪。

反釋奠于學以訊馘告。

天子諸侯無事則歲三田。一為乾豆，二為賓客，三為充君之庖。節無事而不田曰不敬，田不以禮曰暴天物。天子不合圍，諸侯不掩羣。節天子殺則下大綏，諸侯殺則下小綏，大夫殺則止佐車，佐車止則百姓田獵。節獺祭魚，然後虞人入澤梁，豺祭獸，然後田獵。鳩化為鷹，然後設罝羅，草木零落，然後入山林。昆蟲未

蟄，不以火田。不麝，不卵，不殺胎，不殀夭，不覆巢。

冢宰制國用，必於歲之杪，五穀皆入，然後制國用。用地小大，視年之豐耗，以三十年之通制國用量入以為出。節祭用數之。節喪三年不祭，唯祭天地社稷為越紼而行事。喪用三年之。節節喪祭用不足曰暴，有餘曰浩。祭豐年不奢，凶年不儉。節國無九年之蓄曰不足。

無六年之蓄曰急無三年之蓄曰國非其國也三年耕必有一年之食九年耕必有二年之食以三十年之通雖有凶旱水溢民無菜色然後天子食日舉以樂

天子七日而殯七月而葬諸侯五日而殯五月而葬大夫士庶人三日而殯三月而葬三年之喪自天子達節庶人縣封葬不為雨止不封不樹喪不貳事節自天子達於庶人喪從

死者祭從生者節支子不祭

天子七廟三昭三穆與大祖之廟而七諸侯五廟二昭二穆與大祖之廟而五大夫三廟一昭一穆與大祖之廟而三士一廟庶人祭於寢節天子諸侯宗廟之祭春曰禘夏曰禘秋曰嘗冬曰烝節天子祭天地諸侯祭社稷大夫祭五祀天子祭天下名山大川五嶽視三公四瀆視諸侯諸侯祭名山大川之在其地

同禘禘

者天子諸侯祭因國之在其地而無主後者
 節天子牲禘祫禘祫嘗禘祫烝節諸侯禘則不
 禘禘則不嘗嘗則不烝烝則不禘節諸侯禘
 牲禘一牲一祫嘗禘烝禘節天子社稷皆太
 牢諸侯社稷皆少牢大夫士宗廟之祭有田
 則祭無田則薦庶人春薦韭夏薦麥秋薦黍
 冬薦稻韭以卵麥以魚黍以豚稻以鴈節祭
 天地之牛角繭栗宗廟之牛角握賓客之牛

角尺節諸侯無故不殺牛大夫無故不殺羊
 士無故不殺犬豕庶人無故不食珍節庶羞
 不踰牲燕衣不踰祭服寢不踰廟節大夫祭
 器不假祭器未成不造燕器
 古者公田藉而不稅節市廛而不稅節關譏而
 不征節林麓川澤以時入而不禁節夫圭田
 無征節用民之力歲不過三日節田里不粥
 墓地不請

司空執度度地居民山川沮澤時四時量地遠近興事任力

凡使民任老者之事食壯者之食

凡居民材必因天地寒煖燥濕廣谷大川異制

民生其間者異俗剛柔輕重遲速異齊五味

異和器械異制衣服異宜脩其教不易其俗

齊其政不易其宜節中國戎夷五方之民皆

有性也不可推移節東方曰夷被髮文身有

不火食者矣南方曰蠻雕題交趾有不火食

者矣西方曰戎被髮衣皮有不粒食者矣北

方曰狄衣羽毛穴居有不粒食者矣節中國

夷蠻戎狄皆有安居和味宜服利用備器節

五方之民言語不通嗜欲不同達其志通其

欲東方曰寄南方曰象西方曰狄鞮北方曰

譯

凡居民量地以制邑度地以居民地邑民居必

參相得也。節無曠土。無游民。食節事時。民咸安其居。樂事勸功。尊君親上。然後興學。

司徒脩六禮以節民性。明七教以興民德。齊八政以防民淫。一道德以同俗。養耆老以致孝。恤孤獨以逮不足。上賢以崇德。簡不肖以糾惡。節命鄉簡不帥教者以告。耆老皆朝于庠。元日習射。上功習鄉。上齒。大司徒帥國之俊士與執事焉。節不變。命國之右鄉簡不帥教者。移之左。命國之左鄉簡不帥教者。移之右。如初禮。不變。移之郊。如初禮。節不變。移之遂。如初禮。不變。屏之遠方。終身不齒。節命鄉論秀士。升之司徒。曰選士。司徒論選士之秀者。而升之學。曰俊士。節升於司徒者。不征於鄉。升於學者。不征於司徒。曰造士。節樂正崇四術。立四教。順先王詩書禮樂。以造士。春秋教以禮樂。冬夏教以詩書。節王大子。王子。羣后。

者。移之左。命國之左鄉簡不帥教者。移之右。如初禮。不變。移之郊。如初禮。節不變。移之遂。如初禮。不變。屏之遠方。終身不齒。節命鄉論秀士。升之司徒。曰選士。司徒論選士之秀者。而升之學。曰俊士。節升於司徒者。不征於鄉。升於學者。不征於司徒。曰造士。節樂正崇四術。立四教。順先王詩書禮樂。以造士。春秋教以禮樂。冬夏教以詩書。節王大子。王子。羣后。

鄭棘樊若如字也
以爲不讀本急

之天子卿大夫元士之適子國之俊選皆造
焉凡入學以齒節將出學小胥大胥小樂正
簡不帥教者以告于大樂正大樂正以告于
王王命三公九卿大夫元士皆入學不變王
親視學不變王三日不舉屏之遠方西方曰
棘東方曰寄終身不齒節大樂正論造士之
秀者以告于王而升諸司馬曰進士節司馬
辨論官材論進士之賢者以告于王而定其

論論定然後官之任官然後爵之位定然後
祿之

大夫廢其事終身不仕死以士禮葬之節有發
則命大司徒教士以車甲
凡執技論力適四方羸股肱決射御節凡執技
以事上者祝史射御醫卜及百工凡執技以
事上者不貳事不移官出鄉不與士齒仕於
家者出鄉不與士齒

郵與
尤同

王制自文
司寇正刑明辟以聽獄訟必三刺有旨無簡不
聽附從輕赦從重節凡制五刑必即天論郵
罰麗於事節凡聽五刑之訟必原父子之親
立君臣之義以權之意論輕重之序慎測淺
深之量以別之悉其聰明致其忠愛以盡之
大疑獄汜與衆共之衆疑赦之必察小大之比
以成之節成獄辭史以獄成告于正正聽之
正以獄成告于大司寇大司寇聽之棘木之

又當
作宥

下大司寇以獄之成告於王王命三公參聽
之三公以獄之成告於王王三又然後制刑
節凡作刑罰輕無赦節刑者例也例者成也
一成而不可變故君子盡心焉節析言破律
亂名改作執左道以亂政殺節作淫聲異服
奇技奇器以疑衆殺行偽而堅言偽而辯學
非而博順非而澤以疑衆殺假於鬼神時日
卜筮以疑衆殺此四誅者不以聽

凡執禁以齊衆。不赦過節。有圭璧金璋。不粥於市。命服命車。不粥於市。宗廟之器。不粥於市。犧牲。不粥於市。戎器。不粥於市。節用器。不中度。不粥於市。兵車。不中度。不粥於市。布帛精麤。不中數。幅廣狹。不中量。不粥於市。姦色亂正色。不粥於市。節錦文珠玉成器。不粥於市。衣服飲食。不粥於市。節五穀不時。果實未熟。不粥於市。木不中伐。不粥於市。禽獸魚鼈。不

中殺。不粥於市。節關執禁以譏。禁異服。識異言。

太史典禮。執簡記。奉諱惡。天子齊戒。受諫。節司會。以歲之成。質於天子。冢宰齊戒。受質。節大樂正。大司寇。市。三官。以其成。從質於天子。大司徒。大司馬。大司空。齊戒。受質。節百官。各以其成。質於三官。大司徒。大司馬。大司空。以百官之成。質於天子。百官齊戒。受質。然後休老。

勞農成歲事制國用

凡養老節有虞氏以燕禮節夏后氏以饗禮節

殷人以食禮節周人脩而兼用之節五十養

於鄉六十養於國七十養於學達於諸侯節

八十拜君命一坐再至瞽亦如之九十使人

受節五十異粢六十宿肉七十貳膳八十常

珍九十飲食不離寢膳飲從於遊可也節六

十歲制七十時制八十月制九十日脩唯絞

紵衾冒死而后制節五十始衰六十非肉不

飽七十非帛不煖八十非人不煖九十雖得

人不煖矣五十杖於家六十杖於鄉七十杖

於國八十杖於朝九十者天子欲有問焉則

就其室以珍從節七十不俟朝八十月告存

九十日有秩節五十不從力政六十不與服

戎七十不與賓客之事八十齊喪之事弗及

也節五十而爵六十不親學七十致政唯衰

麻為喪節有虞氏養國老於上庠養庶老於下庠節夏后氏養國老於東序養庶老於西序節殷人養國老於右學養庶老於左學節周人養國老於東膠養庶老於虞庠虞庠在國之西郊節有虞氏皇而祭深衣而養老節夏后氏收而祭燕衣而養老節殷人冔而祭縞衣而養老節周人冕而祭玄衣而養老節凡三王養老皆引年節八十者一子不從政

九十者其家不從政廢疾非人不養者一人不從政父母之喪三年不從政齊衰大功之喪三月不從政將徙於諸侯三月不從政自諸侯來徙家期不從政節少而無父者謂之孤老而無子者謂之獨老而無妻者謂之矜老而無夫者謂之寡此四者天民之窮而無告者也皆有常餼節瘠聾跛躄斷者侏儒百工各以其器食之

道路男子由右婦人由左車從中央節父之齒
隨行兄之齒鴈行朋友不相踰節輕任并重
任分斑白者不提挈節君子耆老不徒行庶
人耆老不徒食

方一里者為田九百畝節方十里者為方一
里者百為田九萬畝方百里者為方十里者
百為田九十億畝節方千里者為方百里者
百為田九萬億畝節自恒山至於南河千里

而近自南河至於江千里而近自江至於衡
山千里而遙自東河至於東海千里而遙自
東河至於西河千里而近自西河至於流沙
千里而遙西不盡流沙南不盡衡山東不盡
東海北不盡恒山節凡四海之內斷長補短
方三千里為田八十萬億一萬億畝方百里
者為田九十億畝山陵林麓川澤溝瀆城郭
宮室塗巷三分去一其餘六十億畝節古者

以周尺八尺為步。今以周尺六尺四寸為步。古者百畝當今東田百四十六畝三十步。古者百里當今百二十一里六十步四尺二寸二分。節方千里者為方百里者百。節封方百里者三十國。其餘方百里者七十。節又封方七十里者六十。為方百里者二十九。方十里者四十。節其餘方百里者四十。方十里者六十。又封方五十里者百二十。為方百里者三十。

十。其餘方百里者十。方十里者六十。節名山。大澤不以封。其餘以為附庸間田。諸侯之有功者取於間田以祿之。其有削地者歸之間田。節天子之縣內方千里者為方百里者百。封方百里者九。其餘方百里者九十一。又封方七十里者二十一。為方百里者十。方十里者二十九。其餘方百里者八十。方十里者七十二。又封方五十里者六十二。為方百里者

十五方十里者七十五其餘方百里者六十
四方十里者九十六
諸侯之下士祿食九人中士食十八人上士食
三十六人下大夫食七十二人卿食二百八
十八人君食二千八百八十人節次國之卿
食二百一十六人君食二千一百六十人節
小國之卿食百四十四人君食千四百四十
人節次國之卿命於其君者如小國之卿節

天子之大夫爲三監監於諸侯之國者其祿
視諸侯之卿其爵視次國之君其祿取之於
方伯之地節方伯爲朝天子皆有湯沐之邑
於天子之縣內視元士節諸侯世子世國大
夫不世爵使以德爵以功未賜爵視天子之
元士以君其國諸侯之大夫不世爵祿
六禮冠昏喪祭鄉相見節七教父子兄弟夫婦
君臣長幼朋友賓客八政飲食衣服事爲異

